

KULTUR NEWS - "JEANNE - EIS GËLLE FRA"

Konschtprojet wëll Debat ëm Broschkriibs enttabuiséieren

Vum Anne Wolff (Radio) | Update: 01.10.2021 08:52 | [0 Commentaire\(n\)](#)



"Dass e Mann iwver Broschkriibs schwätzt, soll net aussergewéinlech sinn", betount de Kënschtler Jacques Schneider.

"Broschkriibs geet jiddereen eppes un, net nëmmen déi betraffe Fraen, mä och d'Familljen an d'Gesellschaft", seet de Jacques Schneider. De Kënschtler vum Projet "Jeanne - Eis Gëlle Fra" huet sech fir de Mount vum Broschkriibs eppes Besonnesches iwverluecht: Eng gëlle Fra, déi wéinst dem Kriibs eng Broscht misst amputéiert kréien. De But vun der Campagne: Méi Visibilitéit a manner Tabu.

Broschkriibs ass den heefegste Kriibs zu Lëtzebuerg: E mécht ronn 20% vun all de Kriibsfäll aus, bei de Frae souguer bal 40%. Am Kloertext heescht dat: 1 vun 9 Frae riskéiert viru 75 Joer Broschkriibs ze kréien. Mat der Reinterpretatioun vun der Gëlle Fra wëll de Jacques Schneider en Debat an der Öffentlechkeet ustoussen.

Duerch meng verschidde Projete probéieren ech, d'Gesellschaft fir d'Leide vun de Fraen ze sensibiliséieren. Ech wëll en Debat ustoussen, wéi een de Concernéierten hëllefe kann.

Wichtig ass fir de Kënschtler och, den Debat z'enttabuiséieren. Hie gesäit e Problem doran, dass d'Broscht vun der Fra nach ëmmer ze vill sexualiséiert gëtt an dofir net genuch iwwert de Sujet


geschwat gëtt. Dobäi wier d'Ëmfeld e wichtege Facteur bei der Lutte géint de Kriibs: *Trotz dem Leiden ass et derwäert ze kämpfen. Als Gesellschaft musse mir fir déi Fraen do sinn a si ënnerstëtzen.*


Oppe mat der Krankheet ëmgoen, dat fënnt och d'Marie-Paule Breuskin wichtig. Si huet fir d'zweet Broschkriibs an huet hir Broscht elo missen erofgeholl kréien. Duerch hir Krankheet huet si och aner Frae sensibiliséiert:

Ech sinn ëmmer oppe mat menger Krankheet ëmgaangen an hat ni e Problem, an d'Ëffentlechkeet ze goen. Ech denken och, dass ech duerch meng Krankheet vill Fraen animéiert hunn, an d'Mammographie ze goen. Soss wiere si vläicht net gaangen.

E wichtege Facteur an der Lutte géint de Kriibs ass déi fréi Erkennung. Dat seet och d'Marie-Paule Breuskin: *Ech hat ëmmer déi Chance, dass ech an d'Mammographie gaange sinn. Wou de Kriibs entdeckt gouf, war en nach ganz um Ufank. Ech muss elo och vläicht nach eng Chemo maachen. D'Mammographie ass ganz wichtig fir d'Fréierkennung.*

2018 goufen 456 Broschkriibsfäll zu Lëtzebuerg diagnostizéiert.





Les photos diffusées sur ce site sont soumises à des droits d'auteurs et ne peuvent être copiées, modifiées, vendues, sans l'autorisation préalable du propriétaire du site en question.